

Date – 16/01/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

1. Gen Rtd Dr. Vijay Kumar Singh chu vawiin khan Mizoram Governor 25-na ni tura lak luh a ni.
2. Mizoram district 9-a Village Council leh Local Council inthlanpui chu thla thar, February ni 12 ah neih a ni dawn .
3. Sawrkar laipui chuan a hnuaiia thawkte leh pensioner-te hlawh siamthatu tur 8 Pay Commission a din dawn tih a puang.
4. Indian Space Research Organisation (ISRO) chuan vawiin khan bung thar kaiin satellite pahnih Chaser leh Target te chu SpaDeX mission hmangin hlawhtling takin a kapchhuak.

<><><>

GOVERNOR SWEARING IN

Gen Rtd Dr. Vijay Kumar Singh chu vawiin chawhma dar 11 khan Raj Bhavan Circular Lawn-ah Mizoram Governor 25-na ni tura lak luh a ni.

Governor lakluhna inkhawm hi Chief Secretary Khilli Ram Meena an kaihruiin Larsap Dr. Vijay Kumar Singh hi Gauhati High Court Chief Justice Vijay Bishnoi an rinawmna thu tiam tirin a la lut a ni.

Vawiina Larsap lakluhna inkhawmah hian Chief Minister Pu Lalduhoma, Assembly Speaker Pu Lalbiakzama, Leader of Opposition Pu Lalchandama Ralte leh minister dangte bakah Chief Minister hlui pahnih Pu Zoramthanga leh Pu Lal Thanhawla te pawh telin MLA hrang hrang an tel a, Rajya Sabha MP Pu K. Vanlalvena leh Lok Sabha MP Pu Richard Vanlalmangaiha bakah tlawmngai pawl hruaitu hrang hrang leh sawrkar mi pawimawh an tel baw.

Pu VK Singh-a hi a nupui Pi Bharti Singh nen nimin khan Lengpui Airport lo thlengin, Chief Minister Pu Lalduhoma chuan Lengpui Airport-ah anmahni lawmna leh hmuahna hun a buatsaih a, vawiina lawmluhna hun zawhah hian Larsap hian Assam Rifles hotute a kawm a ni.

<><><>

CM

Chief Minister Pu Lalduhoma chuan Mizoramah bank ten huang an zauh a, hmun kilkhawr zawka mite ban phaka an awm a tul hle a ni a ti.

Nizana Aijal Club-ah Special State Level Bankers' Committee Mizoram for the quarter ended September, 2024 a hmanpuinaah he thu hi sawiin Chief Minister chuan Mizoramah bank engemawzat awm ve tawh mah se a tam zawk chu Aizawl leh district capital-a inbun an la ni a ti a. Banking network tha leh zau Mizoramin a mamawhna a sang hle a ni a ti a. CD ratio in hma a sawn tih a hmuh thu sawiin Chief Minister chuan hetihruah hian bank thenkhat CD ratio

hniam leh lutuk, zaa 40 aia hniam engemawzat an la awm thu leh, bank thenkhat phei chuan zaa 20 pawh an phak loh thu a sawi a. Mizoram ram atangin deposit an dawng khawm tih sawiin chumi atanga zaa 20 vel Mizoramah an puk chhuahtir a, a dang zaa 80 vel state dangah an puk chhuahtir tihna a ni a ti a. Hei hi Mizo mipuite zah lohna tlinga a hriat thu leh sum dawn nan chauhva rawn hmang bank an mamawh loh thu leh hmasawna hna thawhpuitu tur a duh thu a sawi a ni.

Chief Minister chuan sawrkarin mi rethei zawk te khai chhuah tuma Agriculture & Allied sector leh MSME lamah te thapui thawhin hma an la chho tih sawiin bank te chu an thawhpui pawimawh ber zinga mi an nih thu leh inthlahdah lo tura a duh thu a sawi bawk a ni.

<><><>

VC/LC ELECTION

Mizoram district 9-a Village Council leh Local Council inthlanpui chu thla thar, February ni 12 ah neih a ni dawn tih vawiin khan State Election Commissioner Dr H Lalthlangliana'n a puang.

A pisa a thuthar thehdarhtute hma ah vawiin khan State Election Commissioner chuan Autonomous District Council pathum huamchhung district pahnih, Lawngtlai leh Siaha district tih loh, district dang zawngah kumin 2025 February ni 12, Nilaini khian Village council leh Local council inthlanpui neih a ni dawn tih a puang a, vawiin atangin heng district pakua ah hian Model Code of Conduct hman nghal a ni.

He inthlana chuh tum te tan tun thla January ni 23 tlai dar 3 thleng hming pek theih a ni ang a, February ni 12 zing dar 7 atanga tlai dar 4 thleng vote thlak a ni ang a, hemi zan vek hian vote chhiar a ni nghal dawn bawk a, February ni 14 ah VC leh LC sorkar din fel tur a ni bawk a ni.

(BYTE-SEC)

District 9-a Village Council leh Local Council term chu sorkar ruahman angin thla thar February ni 19 ah a tawp dawn a, State Election Commissioner Dr H Lalthlangliana chuan VC leh LC term pawh tawi leh pawh sei chu SEC thu nilovin sawrkar thu a ni a ti a, inthlan chu a term tawp hmaa neih tur a nih angin, SEC chuan inthlan hi a huaihawt mai dawn a ni a ti.

Inthlan neihna turah hian VC 544, awmah seat 2416 a awm a, Aizawl Municipal Corporation leh Lunglei Municipal Council hnuai LC 111 awmah seat 723 a awm a, a pumpui ah vote nei nuai 4, sing 3, 9409 an awm a ni.

Tun tum LC leh VC inthlanah hian Village Council hnuai hmeichhe tana seat reserve 613 a awm a, Local Council-ah chuan hmeichhe seat 195 a awm a ni.

<><><>

AMVCA

Village Council term pawh tawi chungchangah High Court chuan Mizoram sorkar insawifiah turin a hriattir.

All Mizoram VC Association (AMVCA) President Pu K. Lalngaizuala chuan VC term pawhtawi chungchanga sorkar an kinna chu High Court in nimin khan a ngaihtuah a, sorkar chu insawifiah turin a hriattir tih Akashvani a hrilh a. Pu K. Lalngaizuala chuan kar khat chhunga insawifiahna, counter affidavit thehlut tura High Court in sorkar a tih thu sawiin, hei hi January ni 23 aia tlai lova thehlut tura a tih thu leh tun thla ni 30-ah chuan an inkhinna hi chinfel a nih theihna turin High Court in ruahmanna a siam thu a sawi a ni.

AMVCA President chuan State Election Commission in VC/LC inthlan hun puang mahse, High Court thu chu a kal ngaia a kal reng dawn thu leh inthlan hun puan ni mah se High Court-ah VC ten hnehna an chan chuan inthlan theih a nih dawn loh thu a sawi a ni.

Puan tawh angin All Mizoram VC Association chuan an President Pu K. Lalngaizuala hmingin nikum November ni 21-a sorkarin VC term thla 6 a a pawhtawina order chu an khing mek a. Thubuai hi a tirah sorkar order hmasa khinna anga thehluh a nih avangin AMVCA chuan an hnukkir a. Sorkar order hnuhnung zawk khinna tur thehluh lehin thubuai ngaihtuah ni tura ruat tun thla ni 13 khan AMVCA chu dan ang taka register a nih loh avangin hemi ni vek hian an inhnukdawkh leh a. A tuk, tun thla ni 14 khan thubuai hi an President hmingin an thehluh leh a, nimin khan High Court chuan sorkar chu insawifiah turin a ti ta a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Naktuk zing dar 7 leh a chanve-ah Chanchinthar hi puan leh a ni ang.

<><><>

8TH PAY COMMISSION

Sawrkar laipui chuan a hnuaia thawkte leh pensioner-te hlawh siamthatu tur 8 Pay Commission a din dawn tih a puang. Union I&B Minister Ashwini Vaishnaw chuan vawiin khan New Delhi-a Union Cabinet thutlukna chungchanga chanchinbumite a kawmnaah he thu hi a puang a.

Union Minister sawidanin tuna Pay Commission kalmek 7th Pay Commission chu kum 2026 ah a tawp dawn tih a sawi a. 8th pay Commission hian ruahmanna siam turin hun a ngah dawn a ti a. Chairman leh Commission member turte pawh hun reiloteah ruat an ni ang a ti bawkh.

<><><>

ISRO

Indian Space Research Organisation (ISRO) chuan vawiin khan bung thar kaiin satellite pahnih Chaser leh Target te chu SpaDeX mission hmangin hlawhtling takin a kapchhuak. ISRO ten Bharatiya Docking System an siam hmangin he mission hi kalpui a ni a. Heti hain India chu Docking technology hmang hlawhtling thei ram palina a ni a. Hemi hma hian USA, Russia leh China ten an lo kalpui tawh a ni.

ISRO Chairman Dr.V. Narayanan chuan an hlawhtlinnaah thawktute fakawm atih thu sawiin lawmthu a sawi a ni. President Draupadi Murmu pawhin ISRO chu a lawmpui thu sawiin ramchhunga Scientist leh engineer-te tan phurna a pe dawn a ni a ti a. Prime Minister Narendra Modia pawhin social media kaltrangan ISRO a lawmpui thu a sawi a. Ramin space mission a kalpui zel turah rahbi pawimawh tak a ni ang a ti bawkh.

<><><>

PM MANN KI BAAT

Prime Minister Narendra Modi chuan tun thla ni 19 Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 118-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>